

摘藻堂四庫全書薈要

史部

欽定四庫全書薈要

史部

通志卷七十九下

詳校官員外郎臣楊世綸



欽定四庫全書蒼要卷八千九百八十一

史部

通志卷七十九下

宋右迪功郎鄭樵漁仲撰

東坡室傳第二下

魏

曹仁

純弟

曹洪

曹休

曹真

真子爽

丁謚

何晏

畢軌

鄧

李勝

桓範

爽從

弟文叔妻夏侯氏

武帝二十五子

任城威王彰

陳思王植

志

蕭懷王熊

豐愍王

昂相殤王鑠

鄧哀王冲

彭城王據

燕王

宇沛穆王林

中山恭王袞

濟陽懷王珽

陳留恭王峻

范陽閔王矩

趙王幹

臨邑殤

公子上

楚王彪

剛殤公子勤

穀城殤公子

乘郾戴公子整

靈殤公子京

樊安公均

廣宗殤公子棘

東平靈王徽

樂陵王茂

文皇帝九子

贊哀王協 北海悼王蕤 東武陽懷王鑒 東

海定王霖 元城哀王禮 邯鄲懷王邕 清河

悼王貢 廣平哀王儼

蜀

劉永 劉理 後主太子璿

吳

孫靜

子瑜

瑜弟皎

皎弟奐

奐弟綝

孫資

子鄰

孫

子壹

靜曾孫峻

峻從弟

綝

弟輔

弟

翊

姪孫

孫韶

伯父河

子桓

韶

子楷

桓姪

孫丞

吳主五子

孫登 孫慮 孫和 孫霸 孫奮

魏

曹仁字子孝太祖從弟也少好弓馬弋獵及豪傑並起仁亦陰結少年得千餘人周旋淮泗之間遂從太祖為別部司馬行厲鋒校尉太祖之破袁術仁斬獲頗多從征徐州仁常督騎為軍前鋒別攻陶謙將呂由破之還與大軍合彭城大破謙軍從攻費華即墨開陽謙遣別

將救諸縣仁以騎擊破之太祖征呂布仁別攻勾陽拔
之生獲布將劉何太祖平黃巾迎天子都許仁數有功
拜廣陽太守太祖器其勇略不使之郡以議郎督騎太
祖征張繡仁別徇旁縣虜其男女三千餘人太祖軍還
為繡所追軍不利士卒喪氣仁率勵將士甚奮太祖壯
之遂破繡太祖與袁紹久相持於官渡紹遣劉備徇滎
彊諸縣多舉衆應之自許以南吏民不安太祖以為憂
仁曰南方以大軍方有目前急其勢不能相救劉備以

彊兵臨之其背叛固宜也備新將紹兵未能得其用擊之可破也太祖善其言遂使將騎擊備破走之仁盡復收諸叛縣而還紹遣別將韓荀鈔斷西道仁擊荀於雞洛山大破之由是紹不敢復分兵出復與史渙等鈔紹運車燒其糧穀河北既定從圍壺關太祖令曰城拔皆阬之連月不下仁言於太祖曰圍城必示之活門所以開其生路也今公告之必死將人自為守且城固而糧多攻之則士卒傷守之則引日久今頓兵堅城之下以

攻必死之虜非良計也太祖從之城降於是錄仁前後
功封都亭侯從平荊州以仁行征南將軍留屯江陵拒
吳將周瑜瑜將數萬衆來攻前鋒數千人始至仁登城
望之乃募得三百人遣部曲將牛金逆與挑戰賊多金
衆少遂為所圍長史陳矯俱在城上望見金等垂沒左
右皆失色仁意氣奮怒甚謂左右取馬來矯等共援持
之謂仁曰賊衆盛不可當也假使棄數百人何苦而將
軍以身赴之仁不應遂披甲上馬將其麾下壯士數十

騎出城去賊百餘步迫溝矯等以為仁當住溝上為金形勢也仁徑渡溝直前衝入賊圍金等乃得解餘衆未盡出仁復直還突之拔出金兵亡其數人賊衆乃退矯等初見仁出皆懼及見仁還乃歎曰將軍真天人也三軍服其勇太祖益壯之轉封安平亭侯太祖討馬超以仁行安西將軍督諸將拒潼關破超渭南蘇伯田銀反以仁行驍騎將軍都督七軍討銀等破之復以仁行征南將軍假節屯樊鎮荊州侯音以宛叛略傍縣衆數千

人仁率諸軍攻破音斬其首還屯樊即拜征南將軍關羽攻樊時漢水暴溢于禁等七軍皆沒禁降羽仁人馬數千人守城城不沒者數版羽乘船臨城圍數重外內斷絕糧食欲盡救兵不至仁激厲將士示以必死將士感之無二心徐晃救至水亦稍減晃從外擊羽仁得潰圍出羽退走仁少時不修行檢及長為將嚴整奉法令常置科於左右案以從事鄢陵侯彰北征烏丸文帝在東宮以書戒彰曰為將奉法不當如征南邪及即王位

拜仁車騎將軍都督荆揚益州諸軍事進封陳侯增邑
二千并前三千五百戶追賜仁父熾謚陳穆侯置守冢
十家後召還屯宛孫權遣將陳邵據襄陽詔仁討之仁
與徐晃攻破邵遂入襄陽使將軍高遷等徙漢南附化
民於漢北文帝遣使即拜仁大將軍又詔移屯臨潁遷
大司馬復督諸軍據烏江屯合肥黃初四年薨謚忠侯
子泰嗣官至鎮東將軍假節轉封甯陵侯泰薨子初嗣
又分封泰弟楷範皆為列侯而牛金官至後將軍仁弟

純初以議郎參司空軍事督虎豹騎從圍南皮袁譚出戰士卒多死太祖欲緩之純曰今千里蹈敵進不能克退必喪威且懸師深入難以持久彼勝而驕我敗而懼以懼敵驕必可克也太祖善其言遂急攻之譚敗純麾下騎斬譚首及北征三郡純步騎獲單于踰頓以前後功封高陵亭侯邑三百戶從征荊州追劉備于長坂獲其二女輜重收其散卒進降江陵從還譙建安十五年薨文帝即位追謚曰威侯子演嗣官至領軍將軍正元

中進封平樂鄉侯演薨子亮嗣

曹洪字子廉太祖從弟也太祖起義兵討董卓至滎陽為卓將徐榮所敗太祖失馬賊追甚急洪下以馬授太祖太祖辭讓洪曰天下可無洪不可無君遂步從到汴水水深不得渡洪循水得船與太祖俱濟還奔譙揚州刺史陳溫素與洪善洪將家兵千餘人就溫募兵得廬江上甲二千人東到丹陽復得數千人與太祖會龍亢太祖征徐州張邈舉兗州叛迎呂布時大饑荒洪將兵

在前先據東平范聚糧穀以繼軍太祖討邈布於濮陽
布破走遂據東阿轉擊濟陰山陽中牟陽武京密十餘
縣皆拔之以前後功拜鷹揚校尉遷揚武中郎將天子
都許拜洪諫議大夫別征劉表破表別將於舞陽陰葉
堵陽博望有功遷鷹鋒將軍封國明亭侯累從征伐拜
都護將軍文帝即位為衛將軍遷驃騎將軍進封野王
侯益邑千戶并前二千一百戶位特進後徙封都陽侯
始洪家富而性吝嗇文帝少時從洪貸絹百疋洪不稱

意常恨之遂以舍客犯法下獄當死羣臣並救莫能得
卞太后謂郭后曰令曹洪今日死吾明日勅帝廢后矣
后為涕泣屢請乃得免官削爵土洪先帝功臣時人多
為缺音缺
志反望明帝即位拜後將軍更封樂城侯邑千戶
位特進復拜驃騎將軍太和六年薨謚恭侯子馥嗣侯
初太祖分洪戶封子震列侯洪族父瑜修慎篤敬官至
衛將軍封列侯

曹休字文烈太祖族子也天下亂宗族各散去鄉里休

年十餘歲喪父獨與一客擔喪假葬攜將老母渡江至
吳休祖父嘗為吳郡太守休於太守舍見壁上祖父畫
像下榻拜涕泣同坐皆嘉歎之後以太祖舉兵易姓名
轉至荊州間行北歸見太祖太祖謂左右曰此吾家千
里駒也使與文帝同止見待如子常從征伐使領虎豹
騎宿衛劉備遣將吳蘭屯下辯太祖遣曹洪征之以休
為騎都尉參洪軍事太祖謂休曰汝雖參軍其實帥也
洪聞此令亦委事於休備遣張飛屯固山欲斷軍後衆

議狐疑休曰賊實斷道者當伏兵潛行今乃先張聲執此其不能也宜及其未集促擊蘭蘭破則飛自走矣洪從之進兵擊蘭大破之飛果走太祖拔漢中諸軍還長安拜休中領軍文帝即王位為領軍將軍錄前後功封東陽亭侯夏侯惇薨以休為鎮南將軍假節都督諸軍事車駕臨送上乃下輿執手而別孫權遣將屯歷陽休到擊破之又別遣兵渡江燒賊蕪湖營數千家遷征東將軍領揚州刺史進封安陽鄉侯帝征孫權以休為征

東大將軍假黃鉞督張遼等及諸州郡二十餘軍擊權
大將呂範等於洞浦破之拜揚州牧明帝即位進封長
平侯吳將審惠屯皖休擊破斬之吳將韓綜翟丹等前
後率衆詣休降增邑四百并前二千五百戶遷大司馬
都督揚州如故太和二年帝為二道征吳遣司馬懿從
漢水下督休諸軍向尋陽賊將偽降休深入戰不利退
還宿石亭軍夜驚士卒亂棄甲兵輜重甚多休上書謝
罪帝遣屯騎校尉楊暨慰喻禮賜甚隆休因此癰發背

薨謚壯侯子肇嗣肇有當世才度為散騎常侍屯騎校尉明帝寢疾方與燕王宇等屬以後事帝意尋變詔肇以侯歸第正始中薨追贈衛將軍子興嗣初文帝分休戶三百封肇弟纂為列侯後為殄吳將軍薨追贈前將軍

曹真字子丹太祖族子也太祖起兵真父邵募徒眾為州郡所殺太祖哀真少孤撫養如己子使與文帝共止嘗獵為虎所逐顧射虎應聲而倒太祖壯其鷙勇使將

虎豹騎討靈丘賊拔之封靈壽亭侯以偏將軍將兵擊
劉備別將於下辯破之拜中堅將軍從至長安領中領
軍是時夏侯淵沒於陽平太祖憂之以真為征蜀護軍
督徐晃等破劉備別將高詳於陽平太祖自至漢中拔
出諸軍使真至武都迎曹洪等還屯陳倉文帝即王位
以真為鎮西將軍假節督雍涼州諸軍事錄前後功進
封東鄉侯張進等反於酒泉真遣費曜討破之斬進等
黃初三年還京都以真為上軍大將軍都督中外諸軍

事假節鉞與夏侯尚等征孫權擊牛渚屯破之轉拜中

軍大將軍加給事中七年文帝寢疾真與陳羣司馬懿

等受遺詔輔政明帝即位進封邵陵侯

裴松之案真父名邵而封邵陵

侯若非書誤則事不可論

遷大將軍諸葛亮圍祈山南安天水安定

三郡反應亮帝遣真督諸軍屯郿遣張郃擊亮將馬謖

大破之安定民楊條等略吏民保月支城真進軍圍之

條謂其衆曰大將軍自來吾願早降耳遂自縛出三郡

皆平真以亮懲於祈山後必從陳倉出乃使將軍郝昭

王生等守陳倉治其城明年春亮果圍陳倉已有備而
不能克增邑并前二千九百戶四年朝洛陽遷大司馬
賜劔履上殿入朝不趨真以蜀連出侵邊境宜遂伐之
數道並入可大克也帝從其計真當發帝親臨送真以
八月發長安從子午道南入司馬懿泝漢水當會南鄭
諸軍或從斜谷道或從武威入會大霖雨三十餘日棧
道斷絕詔真還軍真少與宗人曹遵鄉人朱讚並事太
祖遵讚早亡真愍之乞分所食邑封遵讚子詔嘉美之

聽分其邑賜遵讚子爵關內侯各百戶真每征行與將士同勞苦軍賞不足輒以家財班賜士卒皆願為用真病還洛陽帝自幸其第省疾薨謚元侯子爽嗣帝追思真功悉封五子義訓則彥皚皆為列侯真弟彬文帝世分真二百戶封為列侯爽字昭伯少以宗室謹重明帝在東宮甚親愛之及即位為散騎侍郎累遷城門校尉加散騎常侍轉武衛將軍寵待有殊帝寢疾乃引爽入卧内拜大將軍假節鉞都督中外諸軍錄尚書事與太

尉司馬懿並受遺詔輔少主明帝崩齊王即位加爽侍
中改封武安侯邑萬二千戶賜劔履上殿入朝不趨贊
拜不名丁謐乃畫策使爽白天子發詔轉司馬懿為太
傅外以名號尊之內欲令尚書奏事先來由已得制其
輕重也爽弟羲為中領軍訓武衛將軍彥散騎常侍侍
講其餘諸弟皆以列侯侍從出入禁闥貴寵莫盛焉初
南陽何晏鄧颺李勝沛國丁謐東平畢軌咸有聲名進
趣於時明帝以其浮華皆黜抑之及爽秉政乃復進敘

任為腹心颺等欲令爽立威名於天下勸使伐蜀爽從其言司馬懿止之不能禁正始五年爽乃西至長安大發卒六七萬人從駱谷入是時關中及氐羌轉輸不能供牛馬騾驢多死民夷號泣道路入谷行數百里賊因山為固兵不得進爽參軍楊偉為爽陳形執宜急還不然而將敗颺與偉爭於爽前偉曰颺勝將敗國家事可斬也爽不悅乃引軍還初爽以懿年德並高恒以父道事之不敢專行及晏等進用咸共推戴說爽以權重不宜

委之於人乃以晏颺謚為尚書晏典選舉軌司隸校尉
勝河南尹諸事希復由懿懿遂稱疾避爽晏等專政共
分割洛陽野王典農部桑田數百頃及壞湯沐地以為
產業承執竊取官物因緣求欲州郡有司望風莫敢忤
旨晏等與廷尉盧毓素有不平因毓吏微過深文致毓
法使主者先收毓印綬然後奏聞其作威如此爽飲食
車服擬於乘輿尚方珍玩充牣其家妻妾盈後庭又私
取先帝才人七八人及將吏師工鼓吹良家子女三十

三人皆以為伎樂詐作詔書發才人五十七人送鄴臺使先帝使仔教習為伎擅取太樂樂器武庫禁兵作窟室綺疏四周數與晏等會其中縱酒作樂義深以為憂屢諫止爽爽並不納義至於涕泣爽又與兄弟數俱出游大司農沛國桓範謂曰總萬機典禁兵不宜並出若有閉城門誰復內人者爽曰誰敢爾邪懿常密為之備九年冬李勝出為荊州刺史爽等令勝辭懿并伺察焉懿見勝命兩婢侍持衣衣落指口言渴婢進粥懿不持

杯而飲粥流霑胸勝曰衆謂明公舊風發動何意乃爾
懿使聲氣纔屬言年老沈疾死在旦夕君當屈并州并
州近胡好為之備且以予師昭為託勝曰還忝本州非
并州也懿復錯亂其辭曰君方到并州勝曰當忝荊州
懿曰年老意荒不解君言今為本州好建功勲勝退告
爽曰司馬公尸居餘氣形神已離不足慮矣故爽等不
復設備十年正月車駕朝高平陵爽兄弟皆從懿乃部
勒兵馬先據武庫遂出屯洛水浮橋奏爽曰臣昔從遼

東還先帝詔陛下秦王及臣升御牀把臣臂深以後事
為念臣言二祖亦屬臣以後事為念此自陛下所見無
所憂苦萬一有不如意臣當以死奉明詔黃門令董箕
等才人侍疾者皆所聞知今大將軍爽背棄顧命敗亂
國典內則僭擬外專威權破壞諸營盡據禁兵羣官要
職皆置所親殿中宿衛厯世舊人皆復斥出欲置新人
以樹私計根據磐牙縱恣日甚外既如此又以黃門張
當為都監專共交關看察至尊候伺神器離間二宮傷

害骨肉天下洶洶人懷危懼陛下但為寄坐耳豈得久
安此非先帝詔陛下及臣升御牀之本意也臣雖朽邁
敢忘往言昔趙高極意秦氏以滅呂霍早斷漢祚永世
此乃陛下之大鑒臣受命之時也太尉臣濟尚書令臣
宇等皆以爽有無君之心兄弟不宜典兵宿衛奏永寧
宮皇太后令勅臣如奏施行臣輒勅主者及黃門令罷
爽義訓吏兵以侯就第不得逗留以稽車駕敢有稽留
便以軍法從事臣輒力疾將兵屯洛水浮橋伺察非常

爽得奏不通迫窘不知所為懿使爽所親信說爽宜早
自歸罪唯免官而已時桓範聞兵起不應太后召矯詔
開平昌門拔劔戟將門候南奔爽懿謂蔣濟曰智囊往
矣濟曰範則智矣驚馬戀棧豆爽必不能用也範果說
爽挾車駕幸許昌招外兵爽兄弟猶豫未決範重謂羲
曰此事昭然卿用讀書何為今卿門戶求貧賤復可得
乎且匹夫持質一人尚欲望活今卿與天子相隨令於
天下誰敢不應今詣許昌不過中宿所憂穀食而大司

農印章在我身義兄弟不從自甲夜至五鼓爽乃投刀
於地曰我亦不失作富家翁範哭曰曹子丹佳人生汝
兄弟牝耳何圖今日坐汝等族滅邪於是爽乃通懿
奏請下詔免已官奉駕還宮爽兄弟歸家懿發卒圍守
之有司奏黃門張當私以所擇十人張何等與爽疑有
姦收付廷尉考實當陳爽與晏等陰謀反逆並先習兵
須三月中發於是收晏等下獄會公卿朝臣廷議以為
春秋之義君親無將將而必誅爽以支屬世蒙殊寵親

受先帝握手遺詔託以天下而包藏禍心蔑棄顧命乃與晏颺及當等謀圖神器範黨同罪人皆為大逆不道於是收爽義訓晏颺謚軌勝範當等皆伏誅夷三族晏何進孫也母尹氏太祖為司空時納晏母為夫人晏長於宮省性無所顧憚服飾擬於太子故文帝特憎之不呼其姓字常謂之為假子尚同母妹金鄉公主少以才秀知名好老莊言作道德論及諸文賦著述凡數十篇與夏侯玄司馬師等皆名盛於時晏嘗曰唯深也故能

通天下之志夏侯太初是也唯幾也故能成天下之務
司馬子元是也唯神也不疾而速不行而至吾聞其語
未見其人蓋欲以神況諸已也晏性自喜又好色動靜
粉白不去手行步顧影故黃初時無所事任及明帝立
頗為冗官至正始初曲合於爽爽亦以才能用為散騎
常侍遷侍中尚書晏為尚書主選舉其宿與之有舊者
多被拔擢爽敗懿使晏治爽等獄晏窮治黨與冀以獲
宥懿曰凡有八族晏疏丁鄧等七族懿曰未也晏窮急

乃曰豈謂晏乎懿曰是也乃收晏鄧颺字元茂鄧禹後也少得士名於京師明帝時為尚書郎除洛陽令坐事免拜中郎又入兼中書郎初颺與李勝等為浮華友及在中書浮華事發被斥出遂不復用正始初乃出為潁川太守轉大將軍長史遷侍中尚書颺為人好貨前在內職許臧艾授以顯官艾以父妾與颺故京師為之語曰以官易婦鄧元茂每所薦達多如此比故何晏選舉不得人頗由颺之不公忠遂同其罪丁謚字彥靖父斐

字文侯初斐隨太祖太祖以斐鄉里特饒愛之斐性好
貨數請求犯法輒得原宥為典軍校尉總攝內外每所
陳說多見從之建安末從太祖征吳斐隨行自以家牛
羸困乃私易官牛為人所白被收送獄奪官其後太祖
問斐曰文侯印綬所在斐亦知見戲對曰以易餅耳太
祖笑顧謂左右曰東曹毛掾數白此家欲令我重治我
非不知此人不清良有以也我之有斐譬如人家有盜
狗而善捕鼠盜雖有少損而完我囊貯遂復斐官聽用

如初後數歲病亡謚少不肯交游但博觀書傳為人沈毅頗有才略太和中常住鄴借人空屋居其中而諸王亦欲借之不知謚已得直開門入謚望見王交脚卧而不起而呼其奴客曰此何等人促呵使去王怒其無禮還具上言明帝收謚繫鄴獄以其功臣子原出後帝聞其有父風召拜度支郎中曹爽宿與相親時爽為武衛將軍數為帝說其可大用會帝崩爽輔政乃拔謚為散騎常侍遂轉尚書謚為人外似疎略而內多所忌其在

臺閣數有彈駁臺中患之事不得行又其意輕貴多所
忽略雖與何晏鄧颺等同位而皆少之唯以執屈於爽
爽亦敬之言無不從故于時謗書謂臺中有三狗二狗
崖柴不可當一狗憑默作疽囊三狗謂何鄧丁也默者
爽小字也其意言三狗皆欲噬人而謚尤甚也奏使郭
太后出居別宮及遣樂安王使北詣鄴又遣文欽令還
淮南皆謚之計司馬懿由是特深恨之畢軌字昭先父
字子禮建安中為典農校尉軌以才能少有名聲明帝

在東宮時軌在文學中黃初末出為長史明帝即位入
為黃門郎子尚公主居處殷富遷并州刺史其在并州
名為驕豪時雜虜數為暴害吏民軌輒出軍擊鮮卑軻
比能失利中護軍蔣濟表曰畢軌前失既往不咎但恐
是後難可以再凡人材有長短不可彊成軌文雅智意
自為美器今失并州換置他州若入居顯職不毀其德
於國事實善此安危之要唯聖恩察之至正始中入為
中護軍轉侍中尚書遷司隸校尉素與曹爽善每言於

爽多見從之李勝字公昭父休字子朗有智略張魯前
為鎮北將軍休為司馬家南鄭時漢中有甘露降子朗
見張魯精兵數萬人有四塞之固遂言赤氣久衰黃家
當興欲魯舉號魯不聽會魯破太祖以其勸魯內附賜
爵關內侯署散官騎從詣鄴至黃初中仕歷上黨鉅鹿
二郡太守後以年老還拜議郎勝少游京師雅有材智
與曹爽善明帝禁浮華而人白勝堂有四窓八達各有
主名用是被收以其所連引者多故得原禁錮數歲帝

崩曹爽輔政勝為洛陽令夏侯玄為征西將軍以勝為
長史玄亦宿與勝厚駱谷之役議從勝出由是司馬懿
不悅於勝累遷滎陽太守河南尹勝前後所歷宰守未
嘗不稱職為尹歲餘廳事前屠蘇壞令人更治之小材
一枚激墮正槓受符吏石虎頭斷之後旬日遷為荊州
刺史未及之官而敗也桓範字元則世為冠族建安末
入丞相府延康中為羽林左監以有文學與王象等典
集皇覽明帝時為中領軍尚書遷征虜將軍東中郎將

使持節都督青徐諸軍事治下邳與徐州刺史鄒岐爭
屋引節欲斬岐為岐所奏不直坐免還復為兗州刺史
怏怏不得意又聞當轉為冀州牧是時冀州統屬鎮北
而鎮北將軍呂昭才實仕進本在範後範謂其妻仲長
曰我寧作諸卿向三公長跪耳不能為呂子展屈也其
妻曰君前在東坐欲擅斬徐州刺史衆人謂君難為作
下今復羞為呂屈是復難為作上也範忿其言觸實乃
以刀環撞其腹妻時懷孕遂墮胎死範亦竟稱疾不赴

冀州正始中拜大司農範前在臺閣號為曉事及為司
農又以清省稱範嘗抄撮漢書中諸事自以意斟酌之
名曰世要論蔣濟為太尉嘗與範會社下羣卿列坐有
數人範懷其所撰欲以示濟謂濟當虛心觀之範出其
書以示左右左右傳之示濟濟不肯視範心恨之因論
他事乃發怒謂濟曰我祖薄德公等何似邪濟性雖彊
毅亦知範剛毅睨而不應各罷範於沛郡仕次在曹真
後于時曹爽輔政以範鄉里老宿於九卿中特敬之然

不甚親也及司馬懿起兵閉城門以範為曉事乃指召之欲使領中領軍範欲應召而其子諫之以為車駕在外不如南出範疑有頃兒又促之範欲去而司農丞吏皆止範範不從乃突出至平昌城門城門已閉門候司蕃故範舉吏也範呼之舉手中版以示之矯曰有詔召我卿促開門蕃欲求見詔書範呵之言卿非我故吏邪何以敢爾乃開之範出城顧謂蕃曰太傅圖逆卿從我去蕃徒行不能及遂避側範南見爽勸爽兄弟以天子

詣許昌徵四方以自輔爽兄弟不能用爽等既免官帝
還宮遂令範隨從到洛水浮橋北望見懿下車叩頭而
無言懿呼範姓曰桓大夫何為爾邪車駕入宮有詔範
還復位範詣闕拜章謝待報會司蕃詣鴻臚自首具說
範前臨出所道懿乃忿然曰誣人以反於法何應主者
曰科律反受其罪乃收範於闕下時人持範甚急範謂
部官曰徐之我亦義士耳遂送廷尉初爽從弟文叔娶
譙郡夏侯文寧之女名令女文叔早死服闋自以年少

無子恐家必嫁之乃斷髮為信其後家果欲嫁之令女聞即復以刀截兩耳居止常依爽及爽被誅曹氏盡死令女家上書與曹氏絕婚彊迎令女歸復欲嫁之令女懼不免竊入寢室以刀斷鼻蒙被而卧其母呼與語不應發被視之血流滿牀席舉室驚惶奔視莫不酸鼻或謂之曰人生世間如輕塵棲弱草耳何至自苦乃爾且夫家夷滅已盡守此欲誰為哉令女曰聞仁者不以盛衰改節義者不以存亡易心曹氏前盛之時尚欲保終

況今衰亡何忍棄之禽獸之行吾豈為乎懿聞而嘉之
聽使乞子字養為曹氏後嘉平中紹功臣世後封真族
孫熙為新昌亭侯邑三百戶以奉真後

武帝二十五子

武皇帝二十五男卞皇后生文皇帝任城威王彰陳思
王植蕭懷王熊劉夫人生豐愍王昂相殤王鑠環夫人
生鄧哀王沖彭城王據燕王宇杜夫人生沛穆王林中
山恭王褒秦夫人生濟陽懷王琰陳留恭王峻尹夫人

生范陽閔王矩王昭儀生趙王幹孫姬生臨邑殤公子
上楚王彪剛殤公子勤李姬生穀城殤公子乘郢戴公
子整靈殤公子京周姬生樊安公均劉姬生廣宗殤公
子棘宋姬生東平靈王徽趙姬生樂陵王茂

任城威王彰字子文少善射膂力過人手格猛虎不避
險阻數從征伐志意慷慨太祖嘗抑之曰汝不念讀書
慕聖道而好乘馬擊劍此一夫之用何足貴也課彰讀
詩書彰謂左右曰丈夫一為衛霍將十萬騎馳沙漠驅

戎狄立功建號耳何能作博士邪太祖嘗問諸子所好使各言其志彰曰好為將太祖曰為將奈何對曰被堅執銳臨難不顧為士卒先賞必行罰必信太祖大笑建安二十一年封鄢陵侯二十三年代郡烏丸反以彰為北中郎將行驍騎將軍臨發太祖戒彰曰居家為父子受事為君臣動以王法從事爾其戒之彰北征入涿郡叛胡數千騎卒至時兵馬未集唯有步卒千人騎數百匹用田豫計固守要隙虜乃散退彰追之身自搏戰射

胡騎胡騎應弦而倒者前後相屬戰過半日彰鎧中數
箭意氣愈厲乘勝逐北至于桑乾去代二百餘里長史
諸將皆以為士馬疲頓又受節度不得過代不可深進
違令輕敵彰曰率師而行唯利所在何節度乎胡走未
遠追之必破從令縱敵非良將也遂上馬令軍中後出
者斬一日一夜與虜相及擊大破之斬首獲生以千數
彰乃倍常科大賜將士將士無有不悅者時鮮卑大人
軻比能將數萬騎觀望彊弱見彰力戰所向皆破乃請

服北方悉平時太祖在長安召彰詣行在所彰自代過
鄴太子謂彰曰卿新有功今西見上宜勿自伐應對常
若不足者彰到如太子言歸功諸將太祖喜持彰鬚曰
黃鬚兒竟大奇也太祖東還以彰行越騎將軍留長安
太祖至洛陽得疾驛召彰未至太祖崩文帝即王位彰
與諸侯就國詔增邑五千并前萬戶黃初二年進爵為
公三年立為任城王四年朝京師疾薨于邸謚曰威及
葬賜鸞輅龍旂虎賁百人如漢東平王故事子楷嗣徙

封中牟王五年改封任城縣太和六年復改封任城國
食五縣二千五百戶青龍三年楷坐私遣官屬詣中尚
方作禁物削縣二千戶正始七年徙封濟南三千戶正
元景元初連增邑凡四千四百戶

陳思王植字子建年十歲餘誦讀詩論及辭賦數十萬
言善屬文太宗常視其文謂植曰汝倩人邪植跪曰言
出為論下筆成章顧當面試奈何倩人時鄴銅爵臺新
成太祖悉將諸子登臺使各為賦植援筆立成可觀太

祖甚異之性簡易不治威儀輿馬服飾不尚華麗每進見難問應聲而對特見寵愛建安十六年封平原侯後徙封臨菑侯太祖征孫權使植留守鄴戒之曰吾昔為頓丘令年二十三思此時所行無悔於今今汝亦年二十三矣可不勉歟植既以才見異而丁儀丁廙楊修等為之羽翼太祖狐疑幾為太子者數矣而植任性而行不自雕礪飲酒不節文帝御之以術矯情自飾宮人左右並為之說故遂定為嗣二十二年增植邑五千并前

萬戶植嘗乘車行馳道中開司馬門出太祖大怒公車
令生死由是重諸侯科禁而植寵日衰太祖既慮終始
之變以楊修頗有才策而又袁氏之甥於是以罪誅修
植益内不自安二十四年曹仁為關羽所圍太祖以植
為南中郎將行征虜將軍欲遣救仁呼有所勅戒時植
將行太子飲焉逼而醉之太祖召不能受命於是悔而
罷之文帝即王位誅丁儀丁廙并其男口植與諸侯並
就國黃初二年監國謁者灌均希指奏植醉酒悖慢劫

脅使者有司請治罪帝以太后故貶爵安鄉侯其年改
封鄆城侯三年立為鄆城王邑二千五百戶四年徙封
雍丘王其年朝京師上疏曰臣自抱釁歸藩刻肌刻骨
追思罪戾晝分而食夜分而寢誠以天罔不可重離聖
恩難可再恃竊感相鼠之篇無禮遄死之義形影相弔
五情愧赧以罪棄生則違古賢夕改之勸忍活苟全則
犯詩人胡顏之譏伏惟陛下德象天地恩隆父母施暢
春風澤如時雨是以不別荊棘者慶雲之惠也七子均

養者尸鳩之仁也舍罪責功者明君之舉也矜愚愛能者慈父之恩也是以愚臣徘徊於恩澤而不能自棄者也前奉詔書臣等絕朝心離志絕自分黃耆無復執珪之望不圖聖詔猥垂齒召至止之日馳心輦轂假處西館未奉闕庭踊躍之懷瞻望反側謹拜表獻詩二篇其辭曰於穆顯考時維武皇受命於天寧濟四方朱旂所拂九土披懷元化滂流荒服來王超商越周與唐比蹤篤生我皇奕世再聰武則肅烈文則時雍受禪炎漢臨

君萬邦萬邦既化率由舊則廣命懿親以藩王國帝曰
爾侯君茲青土奄有海濱方周于魯車服有輝旗章有
敘濟濟雋乂我弼我輔伊予小子恃寵驕盈舉挂時網
動亂國經作藩作屏先軌是墮傲我皇使犯我朝儀國
有典刑我削我紕將寘于理元凶是率明明天子時篤
同類不忍我刑暴之朝肆違彼執憲哀予小子改封充
邑于河之濱股肱弗置有君無臣荒淫之闕誰弼予身
煢煢僕夫于彼冀方嗟予小子乃罹斯殃赫赫天子恩

不遺物冠我玄冕要我朱紱朱紱光大使我榮華剖符
授玉王爵是加仰齒金璽俯執聖策皇恩過隆祇承怵
惕咨我小子頑凶是嬰逝慙陵墓存愧闕廷匪敢傲德
實恩是恃威靈改加足以沒齒昊天罔極性命不圖常
懼顛沛抱罪黃壚願蒙矢石建旗東嶽庶立毫釐微功
自贖危軀授命知足免戾甘赴江湘奮戈吳越天啓其
衷得會京畿遲奉聖顏如渴如饑心之云慕愴矣其悲
天高聽卑皇肯照微又曰肅承明詔應會皇都星陳夙

駕秣馬脂車命彼掌徒肅我征旅朝發鸞臺夕宿蘭渚
芒芒原隰祁祁士女經彼公由樂我稷黍爰有樛木重
陰匪息雖有餽糧饑不遑食望城不過面邑匪游僕夫
警策平路是由元駟藹藹揚鑣灑沫流風翼衡輕雲承
蓋涉澗之濱緣山之隈遵彼河澣黃阪是階西濟關谷
或降或升駢駟倦路再寢再興將朝聖皇匪敢晏寧弭
節長驚指日邁征前驅舉燧後乘抗旌輪不輟運鸞無
廢聲爰暨帝室稅此西墉嘉詔未賜朝覲莫從仰瞻城

闕俯惟闕廷長懷永慕憂心如醒帝嘉其辭義優詔答
勉之初植來朝未到闕留其從官於關東自將兩三人
微行入見清河長公主欲因主以謝罪而關吏以聞帝
使人逆之不得見太后以為自殺也對帝泣會植科頭
負鉄鎖徒跣詣闕下帝及太后乃喜及見之帝猶嚴顏
色不與語又不使冠履植伏地涕泣太后為不樂詔乃
聽復王服是時待遇諸國法峻任城王暴死諸王既懷
友于之痛植及白馬王彪還國欲同路東歸以敘隔絕

之思而監國使者不聽植發憤告離而作詩敘意其辭
悲愴六年帝東征還過雍丘幸植宮增五百戶太和元
年徙封浚儀二年復還雍丘植常自憤怨抱利器而無
所施上疏求自試効力邊境帝疑不用三年徙封東阿
五年一再上疏求存問親戚及陳審舉之義皆優制答
報其年冬詔諸王朝六年正月其二月以陳四縣封植
為陳王邑三千五百戶植每欲求別見獨談論及時政
幸冀試用終不能得既還悵然絕望時法制待蕃國既

自峻迫寮屬皆賈豎下材兵人給其殘老大數不過二
百人又植以前過事復減半十一年中而三徙都嘗汲
汲無歡遂發病薨時年四十一初植登魚山臨東阿喟
然有歸焉之志遂營為墓至是葬焉遺令務從儉薄景
初中詔收黃初中諸奏植罪狀公卿以下議尚書中書
祕書三府太鴻臚者並削除之撰錄植前後所著賦頌
詩銘雜論凡百餘篇副藏內外植庶子志字允恭少好
學以才行稱夷簡有大度兼善騎射植以為保家之主

立以為嗣植薨徙封濟北王晉武帝為撫軍將軍迎陳
留王于鄴志夜謁見帝與語自暮達旦甚奇之及帝受
禪降為鄆城縣公詔以志履德清純才高行潔好古博
物為魏宗英授樂平郡太守在郡上書以為宜尊儒重
道請為博士置吏卒遷章武趙郡太守雖累居郡職不
以政事為意晝則遊獵夜誦詩書以聲色自娛當時見
者未能審其量也咸寧初詔為散騎常侍國子博士帝
嘗閱六代論問志曰是卿先王所作邪志對曰先王有

手所作目錄請歸尋案還奏曰案錄無此帝曰誰作志
曰以臣所聞是臣族父罔所作以先王文高名著欲令
書傳後世是以假託帝曰古來亦多有是顧謂公卿曰
父子證明足以為審自今以後可無復疑後遷祭酒齊
王攸將之國下太常議崇錫文物時博士秦秀等以為
齊王宜內輔朝政不可之藩志又嘗恨其父不得志於
魏因愴然歎曰安有如此之才如此之親不得樹本助
化而遠出海隅晉朝之隆其殆乎哉乃奏議留攸辭甚

剴切議成當上見其從弟高邑公嘉嘉曰兄議固佳百年之後必書晉史目下將無見責邪帝覽議大怒曰曹志尚不明吾心況四海乎以議者不指答所問橫造異論策免太常鄭默於是有司奏收志等結罪詔惟免志官以公還第其餘皆付廷尉頃之志復為散騎常侍丁母憂居喪過禮因此篤疾喜怒失常九年卒太常奏以惡謚崔褒歎曰魏顆不從亂以病為亂故也今謚曹志而謚其病豈謂其病不為亂乎遂謚為定

蕭懷王熊早薨黃初二年追封諡蕭懷公泰和三年又
追封爵為王青龍二年子哀王炳嗣食邑二千五百戶
六年薨無子國除

豐愍王昂字子修弱冠舉孝廉隨太祖南征為張繡所
害無子黃初二年追封諡曰豐悼公三年以樊安公均
子琬奉昂後封中都公其年徙封長子公五年追加昂
號曰豐悼王太和三年改諡曰愍王嘉平六年以琬襲
昂爵為豐王正元景元中累增邑并前二千七百戶琬

薨諡曰恭王子廉嗣

相殤王鐸早薨太和二年追封諡青龍元年子愍王潛嗣其年薨二年子懷王偃嗣邑二千五百戶四年薨無子國除正元二年以樂陵王茂子陽都公竦繼鐸後

鄧哀王沖字倉舒少聰察岐嶷生五六歲智意所及有若成人時孫權致巨象太祖欲知其斤重訪之羣下咸莫能出其理沖曰置象船上而刻其水痕所至稱物以載之則校可知矣太祖大悅即施行焉時軍國多事用

刑嚴重大祖馬鞍在庫而為鼠所齧庫吏懼必死議欲
面縛首罪猶懼不免沖謂曰待三日中然後自歸沖於
是以刀穿單衣如鼠齧者謬為失意貌有愁色太祖問
之對曰世俗以為鼠齧衣者其主不吉今單衣見齧是
以憂戚太祖曰此妄言耳無所苦也俄而庫吏以齧鞍
聞太祖笑曰兒衣在側尚齧況鞍縣柱乎一無所問沖
仁愛識達皆此類也凡應罪戮而為沖微所辯理賴以
濟宥者前後數十太祖數對羣臣稱述有欲傳後意年

十三建安十三年疾病太祖親為請命及亡哀甚文帝
寬喻太祖太祖曰此我之不幸而汝曹之幸也言則流
涕為聘甄氏亡女與合葬贈騎都尉印綬命宛侯據子
琮奉沖後二十二年封琮為鄧侯黃初二年追謚沖曰
鄧哀侯又追加號為公三年進琮爵徙封冠軍公四年
徙封己氏公太和五年加沖號曰鄧哀王景初元年琮
坐事削戶三百貶爵為都鄉侯三年復為己氏公正始
七年轉封平陽公景初正元景元中累增邑并前千九

百戶

彭城王據建安十六年封范陽侯二十三年徙封宛侯
黃初二年進爵為公三年為章陵王其年徙封義陽文
帝以南方下溼又以環大妃彭城人徙封彭城又徙封
濟陰五年詔曰先王建國隨時而制漢祖增秦所置郡
至光武以天下損耗并省郡縣以今比之益不及焉其
改諸王皆為縣王據改封定陶縣太和六年改封諸王
皆以郡為國據復封彭城景初初據坐私遣人詣中尚

方作禁物削縣二千戶二年復所削戶邑正元景元中累增邑并前四千六百戶

燕王宇字彭祖建安十六年封都鄉侯二十二年改封魯陽侯黃初二年進爵為公三年為下邳王五年改封單父縣太和六年改封燕王明帝少與宇同止常愛異之及即位寵賜與諸王殊青龍三年徵入朝景初元年還鄴二年夏復徵詣京師冬十二月明帝疾篤拜宇為大將軍屬以後事受署四日宇深固讓帝意亦變遂免

宇官三年夏還鄴景初正元景元中累增邑并前五千五百戶常道鄉公與宇之子也入繼大宗

沛穆王林建安十六年封饒陽侯二十二年徙封譙黃初二年進爵為公三年為譙王五年改封譙縣七年徙封鄆城太和六年改封沛景初正元景元中累增邑并前四千七百戶林薨子緯嗣

中山恭王袞建安二十一年封平鄉侯袞少好學年十餘歲能屬文每讀書文學左右常恐以精力為病數諫

止之然性所樂不能廢也二十二年徙封東鄉侯其年
又改封贊侯黃初二年進爵為公官屬皆賀袞曰夫生
深宮之中不知稼穡之艱難多驕逸之失諸賢既慶其
休宜輔其闕每兄弟游娛袞獨譚思經典文學防輔相
與言曰受詔察公舉措有過當奏有善亦宜聞不可匿
其美也遂共表稱陳袞之美袞聞大驚懼責文學曰修
身自守常人之行耳而諸君乃以上聞是增其負累也
且如有善何患不聞而遽共如是非益我者其戒慎如

此三年為北海王其年黃龍見鄴西漳水袞上書贊頌
詔賜黃金十斤詔曰昔唐叔歸禾東平獻頌斯皆骨肉
贊美以彰懿親王研精墳典耽味道真文雅炳煥朕甚
嘉之王其克慎明德以終令聞四年改封贊王七年徙
封濮陽太和二年就國袞尚儉約教勅妃妾紡績織紵
習為家人之事五年冬入朝六年冬改封中山初袞來
朝犯京都禁為有司所奏青龍元年詔削縣二戶七百
五十袞憂懼戒勅官屬愈謹帝嘉其意二年復所削縣

三年秋袞得疾病詔遣太醫視疾殿中虎賁齋手詔賜
珍膳相屬又遣太妃沛王林並就省疾袞疾困勅令官
屬曰吾寡德忝寵大命將盡吾既好儉而聖朝著終誥
之制為天下法吾氣絕之日自殯及葬務奉詔書昔衛
大夫遽瑗葬濮陽吾望其墓常想其遺風願託賢靈以
弊髮齒吾兆域必往從之禮男子不卒於婦人之手亟
以時成東堂堂成名之曰遂志之堂輿疾往居之又令
世子曰汝幼小未聞義方早為人君但知樂不知苦必

將以驕奢為失也接大臣務以禮雖非大臣老者猶宜
答拜事兄以恭恤弟以慈兄弟有不良之行當造膝諫
之諫之不從流涕喻之喻之不改乃白其母若猶不改
當以奏聞并辭國土與其守寵罹禍不若貧賤全身也
此亦謂大罪惡耳其微過細故當掩覆之嗟爾小子慎
修乃身奉聖朝以忠貞事太妃以孝敬閨闈之內奉令
于太妃閭闕之外受教於沛王無怠乃心以慰予靈其
年薨詔沛王林留訖葬使大鴻臚持節典護喪事宗正

弔祭贈賻甚厚凡所著文章二萬餘言才不及陳思王而好與之侔子孚嗣景初正元景元中累增戶并前三千四百戶

濟陽懷王玟建安十六年封西鄉侯早薨無子二十年以沛王林子贊襲玟爵邑早薨無子文帝復以贊弟壹紹玟後黃初二年改封濟陽侯四年進爵為公太和四年追進玟爵謚曰懷公六年又進號曰懷王追謚贊曰西鄉哀侯壹薨謚曰悼公子恒嗣景初正元景元中累

增邑并前千九百戶

陳留恭王峻字子安建安二十一年封鄴侯二十二年徙封襄邑黃初二年進爵為公三年為陳留王五年改封襄邑縣太和六年又封陳留甘露四年薨子澳嗣景初正元景元中累增邑并前四千七百戶

范陽閔王矩早薨無子建安二十二年以樊安公均子敏奉矩後封臨晉侯黃初三年追封謚矩為范陽閔公五年改封敏范陽王七年徙封句陽太和六年追進矩

號曰范陽閔王改封敏琅琊王景初正元景元中累增邑并前三千四百戶敏薨謚曰原王子焜嗣

趙王幹建安二十年封高平亭侯二十二年徙封賴亭侯其年改封弘農侯黃初二年進爵徙封燕公三年為河間王五年改封樂城縣七年徙封鉅鹿太和六年改封趙王幹母有寵於太祖及文帝為嗣幹母有力文帝臨崩有遺詔是以明帝常加恩意青龍二年私通賓客為有司所奏帝賜璽書誠誨而不之罪景初正元景元

中累增邑并前五千戶

臨邑殤公子上早薨太和五年追封謚無後

楚王彪字朱虎建安二十一年封壽春侯黃初二年進
爵徙封汝陽公三年封弋陽王其年徙封吳王五年改
封壽春縣七年徙封白馬太和五年冬朝京師六年改
封楚初彪來朝犯禁青龍初為有司所奏詔削縣三戶
千五百二年大赦復所削縣景初三年增戶五百并前
三千戶嘉平元年兗州刺史令狐愚與太尉王淩謀迎

彪都許昌語在凌傳乃遣傳及侍御史就國案驗收治諸連及者廷尉請徵彪治罪於是依漢燕王旦故事使兼廷尉大鴻臚持節賜彪璽書切責之使自圖焉彪乃自殺妃及諸子皆免為庶人徙平原彪之官屬以下及監國謁者坐知情無輔導之義皆伏誅國除為淮南郡正元元年詔封彪世子嘉為常山真定王景元元年增邑并前二千五百戶嘉入晉封高邑公元康中為國子博士後為東莞太守轉員外散騎侍郎

剛殤公子勤早薨太和五年追封謚無後

穀城殤公子乘早薨太和五年追封謚無後

郿戴公子整奉從叔父郎中紹後建安二十二年封郿侯二十三年薨無子黃初二年追進爵謚曰戴公以彭城王據子範奉整後三年封平氏侯四年徙封成武太和三年進爵為公青龍三年薨謚曰悼公無後四年詔以範弟東安鄉公闡為郿公奉整後景初正元景元中累增邑并前千八百戶

靈殤公子京早薨太和五年追封謚無後

樊安公均奉叔父薊恭公彬後建安二十二年封樊侯
二十四年薨子抗嗣黃初二年追進公爵謚曰樊安公
三年徙封抗薊公四年徙封屯留公景初元年薨謚曰
定公子諡嗣景初正元景元中累增邑并前千九百戶
廣宗殤公子棘早薨太和五年追封謚無後

東平靈王徽奉叔父朗陵哀侯王後建安二十二年封
厯城侯黃初二年進爵為公三年為廬江王四年徙封

壽張王五年改封壽張縣太和六年改封東平青龍二年徽使官屬過壽張縣吏為有司所奏詔削縣一戶五百其年復所削縣正始三年薨子翕嗣景初正元景元中累增邑并前三千四百戶翕入晉封廩丘公

樂陵王茂建安二十二年封萬歲亭侯二十三年改封平輿侯黃初三年進爵徙封乘氏公七年徙封中丘茂性傲佞少無寵於太祖及文帝世又獨不王太和元年徙封聊城公其年為王詔書著其不閑禮教且戒飭之

六年改封曲陽王正始三年東平靈王薨茂稱嗑痛不肯發哀居處出入自若有司奏除國土詔削縣一戶五百五年徙封樂陵詔以茂租奉少諸子多復所削戶又增戶七百嘉平正元景元中累增邑并前五千戶

文帝九子

文皇帝九男甄氏皇后生明帝李貴人生贊哀王協潘淑媛生北海悼王蕤朱淑媛生東武陽懷王鑒仇昭儀生東海定王霖徐姬生元城哀王禮蘇姬生邯鄲懷王

邕張姬生清河悼王貢宋姬生廣平哀王儼

贊哀王協早薨太和五年追封謚曰經殤公青龍二年更追改號謚三年子殤王尋嗣景初三年又增戶五百并前三千戶正始九年薨無子國除

北海悼王蕤黃初七年明帝即位立為陽平縣王太和六年改封北海青龍元年薨二年以琅邪王子贊奉蕤後封昌鄉公景初二年立為饒安王正始七年徙封文安正元景元中累增邑并前三千五百戶

東武陽懷王鑒黃初六年立其年薨青龍三年賜謚無子國除

東海定王霖黃初三年立為河東王六年改封館陶縣明帝即位以先帝遺意愛寵霖異於諸國而霖性麤暴閨門之內婢妾之間多所殘害太和六年改封東海嘉平元年薨子啓嗣景初正元景元中累增邑并前六千二百戶高貴鄉公髦霖之子也入繼大宗

元城哀王禮黃初二年封秦公以京兆郡為國三年改

為京兆王六年改封元城王太和三年薨五年以任城王楷子悌嗣禮後六年改封梁王景初正元景元中累增邑并前四千五百戶

邯鄲懷王邕黃初二年封淮南公以九江郡為國三年進為淮南王四年改封陳六年改封邯鄲太和三年薨五年以任城王楷子溫嗣邕後六年改封魯陽景初正元景元中累增邑并前四千四百戶

清河悼王貢黃初三年封四年薨無子國除

廣平哀王儼黃初三年封四年薨無子國除

臣謹按袁子曰魏興大亂之後民人損減不可則以古始於是封建侯王皆使寄地空名而無其實王國有老兵百餘人以衛其國雖有王侯之號而乃儕於匹夫縣隔千里之外無朝聘之儀鄰國無會同之制諸侯游獵不得過三十里又為設防輔監國之官以伺察之王侯皆思為匹夫而不能得既違宗國藩屏之義又虧親戚骨肉之恩遂至於敗亡云

蜀

劉永字公壽先主子後主庶弟也章武元年六月立為魯王建興八年改封甘陵王初永憎宦人黃皓皓既信任用事譖構永於後主後主稍疏外永至不得朝見者十餘年咸熙元年永東遷洛陽拜奉車都尉封為鄉侯劉理字奉孝亦後主庶弟也與永異母章武元年六月立為梁王建興八年改封安平王延熙七年卒諡曰悼王子哀王允嗣十九年卒子殤王承嗣二十年卒無子

景曜四年以武邑侯輯襲王位輯理子也咸熙元年東遷洛陽拜奉車都尉封鄉侯

後主太子璿字文衡母王貴人本敬哀張皇后侍人也延熙元年立為皇太子時年十五景曜六年冬蜀亡咸熙元年正月鍾會作亂於成都璿為亂兵所害璿弟瑤琮瓚譙詢璩六人譙自殺餘皆內徙永嘉大亂子孫絕滅唯永孫元奔蜀李雄偽署安樂公以嗣禪後永和中原溫討李勢元猶在云

吳

孫靜字幼臺堅季弟也堅始舉事靜糾合鄉曲及宗族五六百人以為保障衆咸附焉策破劉繇定諸縣進攻會稽遣人請靜靜將家屬與策會于錢唐是時太守王朗拒策於固陵策數渡水不能克靜說策曰朗負阻城守難可卒拔查瀆南去此數十里而道之要徑也宜從彼據其內所謂攻其無備出其不意者也吾當自帥衆為軍前隊破之必矣策曰善乃詐令軍中曰頃連雨水

濁兵飲之多腹痛令促具甕缶數百口澄水至昏暮四
維然火誑朗便分軍夜投查瀆道襲高遷屯朗大驚遣
故丹陽太守周昕等帥兵前戰策破昕等斬之遂定會
稽表拜靜為奮武校尉欲授之重任靜戀墳墓宗族不
樂出身求留鎮守策從之權統事就遷昭義中郎將終
於家有五子曷瑜皎與謙曷三子綽超恭超為偏將軍
恭生峻綽生緄瑜字仲異以恭義校尉始領兵衆是時
賓客諸將多江西人瑜虛心綏撫得其歡心建安九年

領丹陽太守為衆所附至萬餘人加綏遠將軍十一年

與周瑜共討麻保二屯破之後從權拒曹公於濡須權
欲急戰瑜說權持重權不從軍果無功遷奮威將軍領
郡如故自溧陽徙屯牛渚瑜以永安人饒助為襄安長
無錫人顏連為居巢長使招納廬江二郡各得降附濟
陰人馬普篤學好古瑜厚禮之使二府將吏子弟就業
遂立學官臨饗講肄是時諸將皆以軍務為事而瑜好
樂墳典雖在戎旅誦聲不絕年三十九建安二十年卒

五子彌熙耀曼紘曼至將軍列侯瑜弟皎字叔朗始拜
護軍校尉領衆二千餘人是時曹公數出濡須皎每赴
拒號為精銳遷都護征虜將軍代程普督夏口黃蓋及
兄瑜卒又并其軍賜沙羨雲杜南新市竟陵為奉邑自
置長史輕財能施善於交結與諸葛瑾至厚委廬江劉
靖以得失江夏李允以衆事廣陵吳碩河南張梁以軍
旅而傾心親待莫不自盡皎嘗遣兵候獲魏邊將吏美
女以進皎皎更其衣服送還之下令曰所欲誅者曹氏

其百姓何罪自今以往不得擊其老弱由是江淮間多
歸附者嘗以小故與甘寧爭或以諫寧寧曰臣子一例
征虜雖公子何得專行侮人邪吾值明主但當効力以
報所天誠不能隨俗屈曲矣權聞之以書讓皎皎得書
上疏陳謝遂與寧結厚後呂蒙當襲南郡權欲令皎與
蒙為左右部大督蒙說權曰若至尊以征虜能宜用之
以蒙能宜用蒙昔周瑜程普為左右部督共攻江陵雖
事決於瑜普自恃久將且俱是督遂共不睦幾敗國事

此目前之戒也。權寤乃以蒙為大督，皎為後繼，禽關羽。定荊州，皎有力焉。建安二十四年卒，權追錄其功，封子允為丹陽侯，胤卒。無子弟，晞嗣領兵。有罪自殺。國除，弟咨、彌、儀皆將軍，封侯。咨、羽、林督儀，無難督咨為滕。允所殺儀為孫峻所害。皎弟奐，字季明，兄皎既卒，代統其衆。以揚武中郎將領江夏太守。在事一年，遵皎舊迹，禮劉靖、李允、吳碩、張梁及江夏閭舉等，並納其善。奐訥於造次，而敏於當官。軍民稱之。黃武五年，權攻石陽，奐以地。

主使所部將軍鮮于丹帥五千人先斷淮道自帥吳碩
張梁為軍前鋒降高城得三將大軍引還權詔使在前
住駕過其軍見吳軍陣整齊權歎曰吾初憂其遲鈍今
治軍諸將少能及者吾無憂矣拜揚威將軍封沙羨侯
吳碩張梁皆裨將軍賜爵關內侯吳亦愛樂儒生復命
部曲子弟就業後仕進者數十人嘉禾中卒時年四十
子承嗣以昭武中郎將代統兵領郡赤烏六年卒無子
封承庶弟壹奉吳後襲業為將孫峻之誅諸葛恪也壹

與全熙施績攻恪弟公安督融融自殺壹從鎮南遷鎮
軍假節督夏口及孫綝誅滕胤呂據據胤皆壹之妹夫
也壹弟封又知胤據謀自殺綝遣朱異潛襲壹壹知之
率部曲千餘口過將胤妻奔魏魏以壹為車騎將軍儀
同三司封吳侯以故主芳貴人邢氏妻之邢美色妬忌
下不堪命遂共殺壹及邢氏壹入魏黃初三年死靜曾
孫峻字子遠父恭為散騎侍郎峻少便弓馬精果膽決
孫權末徙武衛都尉為侍中權臨薨受遺輔政領武衛

將軍典宿衛封都鄉侯既誅諸葛恪遷丞相大將軍督
中外諸軍事假節進封富春侯峻素無重名驕矜險害
多所刑殺百姓囂然又姦亂宮人與公主魯班私通五
鳳元年吳侯英謀殺峻事泄死二年魏將毋丘儉文欽
以衆叛與魏人戰于樂嘉峻遣驃騎將軍呂據左將軍
留贊襲壽春會欽敗降軍還是歲蜀使來聘將軍孫儀
孫邵緄恂等欲因會殺峻事泄儀等自殺死者數十人
并及公主魯育太平元年峻用征北將軍文欽計將征

魏先遣欽與呂據車騎劉纂鎮南朱異前將軍唐咨自江都入淮泗以圖青徐進至石頭餞之入據營據御軍嚴整峻惡之稱心痛而去遂夢為諸葛恪所擊恐懼發病死時年三十八以後事付從弟緄緄字子通父綽為安民都尉緄始為偏將軍及峻死為侍中武衛將軍領中外諸軍事代知朝政呂據聞之大恐與諸將共表滕胤為丞相緄更以胤為大司馬代呂岱駐武昌據引兵還使人報胤欲共廢緄胤乃勒兵自衛緄使將軍劉丞

攻之殺盾及將士數十人夷盾三族事在盾傳緄既誅
盾遷大將軍假節封永寧侯負責倨傲多行無禮遇峻
從弟右將軍慮甚薄慮怒與將軍王惇謀殺緄殺惇
慮服藥死魏大將諸葛誕舉壽春叛保城請降吳遣文
欽唐咨全端全懌等救之魏人圍誕欽等突圍入城魏
悉中外軍增誕之圍朱異率衆屯安豐為文欽勢為魏
師所敗緄於是大發卒出屯鑊里復遣異率諸將攻魏
連敗而歸緄更授兵三萬人使異死戰異不從緄斬之

會誕敗緄引軍還緄既不能拔出誕而喪敗士卒自戮
名將莫不怨之及孫亮始親政事多所問難緄甚懼乃
還建業稱疾不朝築室於朱雀橋南使弟威遠將軍據
入蒼龍宿衛武衛將軍恩偏將軍幹長水校尉閭分屯
諸營欲以專朝自固亮內嫌緄乃推魯育自殺本未責
怒虎林督朱熊熊弟外部督朱損不匡正孫峻乃令丁
奉殺熊及損緄入諫不從亮遂與公主魯班太常全尚
將軍劉丞議誅緄亮妃緄從姊妹也密以告緄緄率衆

夜襲全尚遣弟恩殺劉丞於蒼龍門外遂圍宮使光祿
勲孟宗告廟廢亮召羣臣議議者皆震怖曰唯將軍令
緄遣中書郎李崇奪亮璽綬以亮罪狀班告遠近尚書
桓彝不肯署名緄怒殺之以亮為會稽王遣將軍孫耽
送之國徙尚於零陵遷公主於豫章典軍施正勸緄徵
琅邪王休而立之緄遣宗正楷奉書迎休休入即位緄
稱草莽臣詣闕上書上印綬節鉞乞退還田里以避賢
路休引見慰喻又下詔以大將軍為丞相荊州牧食五

縣恩為御史大夫衛將軍據右將軍皆縣侯幹雜號將軍亭侯閼亦封亭侯緄一門五侯皆典禁兵權傾人主自吳國朝臣未嘗有也緄奉牛酒詣休休不受齋詣左將軍張布酒酣出怨言曰初廢少主時多勸吾自為之者吾以陛下賢明故迎之帝非我不立今上禮見拒是與凡臣無異會當改圖耳布以言聞休休銜之恐其有變數加賞賜又復加恩侍中與緄分省文書或有告緄懷怨侮上欲圖反者休執以付緄緄殺之由是愈懼因

孟宗求出屯武昌休許焉盡勅所督中營精兵萬餘人
皆令裝載所取武庫兵器咸令給與將軍魏邈說休曰
緄居外必有變武衛施朔又告緄欲反有徵休密問張
布布與丁奉謀於會殺緄永安元年十二月丁卯建業
中謠言明會有變緄聞之不悅夜大風發木揚沙緄益
恐戊辰臘會緄稱疾休彊起之使者十餘輩緄不得已
將入衆止焉緄曰國家屢有命不可辭可豫整兵令府
內起火因是可得速還遂入尋而火起緄求出休曰外

兵多不足煩丞相也。緄起離席奉布目左右縛之。緄叩首曰：願徙交州。休曰：卿何以不徙？滕胤據緄，復曰：願沒為官奴。休曰：何不以胤據為奴乎？遂斬之。以緄首令其衆曰：諸與緄同謀皆赦。放仗者五千人。闔乘船欲北降，追殺之。夷三族，發峻棺，取其印綬，斲其木而埋之。以殺魯育等故也。緄死時年二十八。休恥與峻、緄同族，特除其屬籍，稱之曰故峻。故緄云：休又下詔曰：諸葛恪、滕胤、呂據並以無罪為峻、緄兄弟所害，可為痛心。促皆改。

葬各為祭奠其罹恪等事見遠徙者一切召還

孫賁字伯陽父羌字聖壹堅同產兄也賁早孤弟輔尚幼賁贍育友愛甚篤為郡督郵守長堅於長沙起義兵賁去吏從征伐堅薨賁攝帥餘衆扶送靈柩後袁術徙壽春賁又依之術從兄紹用會稽周昂為九江太守紹與術不協遣賁攻破昂於陰陵術表賁領豫州刺史轉丹陽都尉行征虜將軍討平山越為揚州刺史劉繇所迫逐因將士衆還住歷陽頃之術復使賁與吳景共擊

樊能張英等未能拔及策東渡江助賁景破英能等遂
進擊劉繇繇走豫章策遣賁景還壽春報術值術僭號
署置百官除賁九江太守賁不就棄妻奴還江南時策
已平吳會二郡賁與策征廬江太守劉勲江夏太守黃
祖軍旋聞繇病死過定豫章上賁領太守復封都亭侯
建安十三年使者劉隱奉詔拜賁為征虜將軍領郡如
故在官十一年卒子鄰嗣鄰年九歲代領豫章進封都
鄉侯在郡垂二十年討平叛賊政績修理召還武昌為

繞帳督遷夏口沔中督威遠將軍所居任職赤烏二十

年卒子苗嗣苗弟旅及叔父安熙績皆歷列位賁弟輔
字國儀以揚武校尉佐孫策平三郡策討丹陽七縣使
輔西屯厯陽以拒袁術又從策討陵陽生得祖郎等策
西襲廬江太守劉勲輔隨從身先士卒有功策上輔廬
陵太守遷平南將軍假節領交州刺史輔恐權不能守
江東因權出行東冶乃遣人齎書呼曹公行人以告權
乃還偽若不知與張昭共見輔權謂輔曰兄厭樂邪何

為呼他人輔云無是權因投書與昭昭示輔輔慙無辭
乃悉斬輔親近分其部曲徙輔置東數歲卒子興昭偉
昕皆歷列位

孫翊字叔弼權弟也驍悍果烈有兄策風太守朱治舉
孝廉司空辟建安八年以偏將軍領丹陽太守時年
二十初孫權殺吳郡太守盛憲憲故孝廉姊覽戴員亡
匿山中翊為郡皆禮致之以覽為大都督督兵員為郡
丞覽員親近邊鴻等數為翊所困常欲叛逆因吳主出

征遂其姦計時諸縣令長並會見翊翊大請賓客既醉
送客鴻從後斫殺翊郡中擾亂鴻迸走入山翊妻徐氏
構募追捕中宿乃得覽員歸罪殺鴻諸將皆知覽員所
為而力不能討覽入居軍府中悉取翊嬪妾及左右侍
御欲復取徐徐恐逆之見害乃紿之曰乞須晦日設祭
除服然後聽命潛使所親語翊舊將孫高傅嬰等與共
圖覽高嬰涕泣許諾密呼翊時侍養者二十餘人以徐
意語之共設盟誓合謀到晦日設祭徐氏哭泣盡哀畢

乃除服薰香沐浴更於他室安施幃帳言笑歡悅示無戚容大小悽愴怪其如此覽密覘視無復疑意徐呼高嬰與諸婢羅住戶內使人召覽覽盛服而入徐出戶拜覽適得一拜徐便大呼二君可起高嬰俱出共得殺覽餘人即就外殺員徐氏乃還縗經奉覽員首以祭翊墓舉軍震駭以為神異吳主續至悉誅覽員餘黨擢高嬰為牙門其餘皆賜金帛時建安九年也翊子松為射聲校尉都鄉侯黃龍三年卒蜀丞相諸葛亮甚器松聞其

死甚傷悼之翊弟匡字季佐舉孝廉茂才未試用卒時年二十餘子泰曹氏之甥也為長水校尉嘉禾三年從權圍新城中流矢死泰子秀為前將軍夏口督秀公室至親提兵在外皓意不能平建衡二年皓遣何定將五千入至夏口獵先是民間僉言秀當見圖而定遠獵秀遂驚夜將妻子親兵數百人奔晉晉以秀為驃騎將軍儀同三司封會稽公皓大怒追改秀姓曰厲秀在晉朝聞皓降羣臣畢賀秀稱疾不與南向流涕曰昔討逆弱

冠以一校尉創業今後主舉江南而棄之宗廟山陵於此為墟悠悠蒼天此何人哉朝廷美之以吳平降為伏波將軍開府如故永寧中卒子儉官至給事中

孫韶字公禮伯父河字伯海本姓俞氏亦吳人也孫策愛之賜姓為孫列之屬籍或云河堅族子也出後姑俞氏後復姓為孫河質性忠直訥言敏行有氣幹能服勤少從堅征討常為前驅後領左右兵典知內事待以腹心之任又從策平定吳會從權討袁術術破拜威寇中

郎將領廬江太守後為將軍屯京城孫翊之遇害也河
馳赴宛陵責怒覽員以不能全翊令使姦變得施二人
議曰伯海與將軍疏遠而責我乃爾討虜若至吾屬無
類矣遂殺河使人北迎揚州刺史劉馥令住歷陽以丹
陽應之會覽員就誅韶年十七收河餘衆繕治京城起
樓櫓修器備以禦敵權聞亂從椒丘還過定丹陽引軍
歸吳夜至京城下營試攻驚之兵皆乘城傳檄備警謹
聲動地頗射外人權使曉諭乃止明日見韶甚器之即

拜丞烈校尉統河部曲食曲阿丹徙二縣自置長吏一
如河舊後為廣陵太守偏將軍權為吳王遷揚威將軍
封建德侯權稱尊號為鎮北將軍韶為邊將數十年善
養士卒得其死力常以警彊場遠斥侯為務先知動靜
而為之備故鮮有負敗青徐汝沛頗來歸附淮南濱江
屯候皆撤兵遠徙徐泗江淮之地不居者各數百里自
權西征還都武昌韶不進見者十餘年權還建業乃得
朝覲權問青徐諸屯要害遠近人馬衆寡魏將帥姓名

盡具識之所問咸對身長八尺儀貌都雅權悅曰吾久
不見公禮不圖進益乃爾加領幽州牧赤烏四年卒子
越嗣至右將軍越兄楷武衛大將軍臨成侯代越為京
下督楷弟異至領軍將軍奕宗正卿恢武陵太守天璽
元年徵楷為宮下鎮驃騎將軍初永安賊施但等劫皓
弟謙襲建業或白楷二端不即赴討者皓數遣詰楷楷
常惶怖而卒被召遂將妻子親兵數百人歸晉晉以為
車騎將軍封丹陽侯吳平降為渡遼將軍永安元年卒

河子桓字叔武少聰朗年二十五拜安東中郎將與陸遜共拒劉備備軍衆甚盛彌山亘谷桓投刀奮命與遜戮力備遂敗走桓斬上兜道截其徑要備踰山越險僅乃得免忿恚歎曰吾昔初至京城桓尚小兒而今迫孤乃至此也桓以功拜建武將軍封丹徒侯下牛渚作橫江塢會卒桓弟俊為定武中郎將赤烏十三年卒長子建襲爵平虜將軍少子慎鎮南將軍慎子丞好學有文章皓世為黃門侍郎吳平赴洛為范陽涿令甚有政績

永安中陸機為都督請丞為司馬與機俱被害

吳主五子

孫登字子高權長子也魏黃初二年以權為吳王拜登東中郎將封萬戶侯登辭疾不受是歲立登為太子選置師傅銓簡秀士以為賓友於是諸葛恪張休顧譚陳表等以選入侍講詩書出從騎射權欲登讀漢書習知近代之事以張昭有師法重煩勞之乃令休從昭受讀還以授登登待接僚屬略用布衣之禮與恪休譚等或

同輿而載或共帳而寐太傅張溫言於權曰中庶子官最親密切問近對宜用雋德乃用表等為中庶子又以庶子禮拘復令整巾侍坐黃龍元年權稱尊號登為皇太子以恪為左輔休為右弼譚為輔正表為翼正是為四友而謝景范慎刁元羊衡等皆為賓客於是東宮號為多士權遷都建業徵大將軍陸遜輔登鎮武昌領宮府留事登或射獵當由徑道常遠避良田不踐苗稼至所頓息又擇空閑之地其不煩民如此嘗乘馬出有彈

丸過左右求之有一人操彈佩丸咸以為是辭對不服從者欲捶之登不聽使求過丸比之非類乃見釋又失盛水金馬孟覺得其主乃左右所為不忍致罰呼責數之長遣歸家勅親近勿言後弟慮卒權為之降損登詣權晝夜兼行到賴鄉自聞即時召見見權悲泣因諫曰慮寢疾不起此乃天命也方今朔土未一四海喁喁天戴陛下而以下流之念減損太官殽饌過於禮制臣竊憂惶權納其言為之加膳住二十餘日欲遣西還深自

陳乞以久離定省子道有闕又陳陸遜忠勤無所顧憂
權遂留焉嘉禾三年權征新城使登居守總知留事時
年穀不豐頗有盜賊乃表定科令所以防禦甚得止姦
之要初登所生庶賤徐夫人少有母養之恩後徐氏以
妬廢處吳而步夫人最寵步氏有賜登不敢辭拜受而
已徐氏使至所賜衣服必沐浴服之登將拜太子辭曰
本立而道生欲立太子宜先立后權曰卿母安在登曰
在吳權默然立凡二十一年年三十三卒臨終上疏以

弟和仁孝聰哲德行清茂宜早建置以繫民望又多所
薦達賢士夫并陳時政既絕而後書聞權益以摧感言
則隕涕是歲赤烏四年也謝景時為豫章太守不勝哀
情棄官奔赴拜表自劾權曰君與太子從事異於他吏
使中使慰勞聽還本職發遣還郡謚登曰宣太子子璠
希皆早卒次子英封吳侯五鳳元年英以大將軍孫峻
專權誅之事覺自殺國除

孫慮字子智登弟也少敏惠有才藝權器愛之黃武七

年封建昌侯二年丞相雍等奏慮性聰體達所向日新
比方近漢宜進爵稱王權未許久之尚書僕射存上疏
言慮才並文武宜以為鎮軍大將軍授任偏方以光大
業權乃許之於是假節開府治半州慮以皇子之尊富
於春秋遠近嫌其不能留意及至臨事遵奉法度敬納
師友過於衆望年二十嘉禾元年卒無子國除

孫和字子考慮弟也少以母王有寵見愛年十四為置
宮衛使中書令闕澤教以書藝和好學下士甚見稱述

登亡立為太子時年十九闕澤為太傅薛綜為少傅蔡
穎張純封輔嚴維等皆從容侍從是時有司頗以條書
問事和以為姦妄之人將因事錯意以生禍心不可長
也表宜絕之又都督劉寶白庶子丁晏晏亦白寶和謂
寶曰文武在事當能幾人因隙構簿圖相危害豈有福
哉遂兩釋之使相厚善是後王夫人與全公主有隙權
嘗寢疾和祠祭於廟而和妃叔父張休居近廟邀和過
所居全公主使人覘視因言於權曰太子不在廟中專

就妃家計議又言王夫人見上寢疾有喜色權由是發怒夫人憂死而和寵稍損魯王霸覬覦滋甚陸遜吾粲顧譚等數陳適庶之義理不可奪全寄楊竺為霸支黨譖愬日興粲遂下獄誅譚徙交州權沈吟者厯年後遂幽閉和於是驃騎將軍朱據僕射屈見等率諸將吏泥頭自縛連日詣闕請和權登白爵觀見甚惡之勅據見等無事恣恣權欲廢和立亮無難督陳正五營督陳象上書稱引晉獻公殺申生立奚齊晉國擾亂據見又固

諫不止權大怒族誅正象據晃牽入殿杖一百竟徙和
於故鄣羣臣坐諫誅放者十數人衆咸寃之太元二年
正月封和為南陽王遣之長沙四月權薨諸葛恪秉政
恪即和妃張之舅也妃使黃門陳遷之建業上疏中宮
并致問於恪臨去恪謂遷曰為我達妃期當使妃勝他
人其言頗泄又恪有徙都意使治武昌宮民間或言欲
迎和及恪被誅孫峻因此奪和璽綬徙新都又遣使者
賜死和與妃張辭別張曰吉凶當終相隨不獨生活也

亦自殺舉邦傷焉和四子皓德謙俊孫休立封皓為烏程侯德錢唐侯謙永安侯俊拜騎都尉休薨皓入即阼其年追謚父和曰文皇帝改葬明陵置園邑令丞守視後年又分吳郡丹陽九縣為吳興郡治烏程置太守四時奉祠寶鼎二年復立廟京師號清廟其後皓在武昌吳興施但因民之不堪命聚萬餘人劫謙將至秣陵欲立之但兵敗謙被執皓醜之并殺俊

孫霸字子威和同母弟也和為太子霸為魯王寵愛崇

特與和無異頃之和霸不穆權禁斷往來督軍使者羊
銜上疏乞發優詔使二宮周旋禮命如初權不能用時
全寄吳安孫奇楊竺等陰共輔霸圖危太子譖毀既行
太子以敗霸亦賜死流竺屍于江竺兄穆以數諫戒竺
得免大辟猶徙南州霸賜死又誅寄安奇等咸以黨霸
構和故也霸二子基壹五鳳中封基為吳侯壹宛陵侯
基侍孫亮在內太平二年盜乘御馬收付獄罪當死亮
不忍為特赦宮中基以得免孫皓即位追和霸舊隙削

基壹爵土與祖母謝姬俱徙會稽烏傷縣

孫奮字子揚霸母弟也母曰仲姬太元二年立為齊王
居武昌權薨太傅諸葛恪不欲諸王居江濱兵馬之地
徙奮於豫章奮怒不從命又數越法度恪上牋為陳禍
福奮得牋懼遂移南昌然游獵彌甚官屬不堪命及恪
誅奮下蕪湖欲至建業觀變傅相謝慈等諫奮奮殺之
坐廢為庶人徙章安縣太平二年封為章安侯建衡二
年孫皓左夫人王氏卒皓哀念過甚朝夕哭臨數月不

出由是民間或謂皓死訛言奮與上虞侯奉當有立者
奮母仲姬墓在豫章豫章太守張俊疑其或然埽除墳
塋皓聞之車裂俊夷三族誅奮及其五子國除



通志卷七十九下



總校官庶吉士臣侍朝

校對官庶吉士臣陳文樞

謄錄舉人臣呂燕昭